

Jü Carta San Pablota Jiojtekähui Jume Efesiommehui

Teboteri

1 ¹Ínapone Pablo, Jesucristota apóstol Diosta ínel éä pámani, jume tüisi Dios huáateka entok Cristopo santosi emo jípuremmehui, pueblo Efesopo jóakammehui. ²Diosta tühua entok yánti jíapsihuame enchimmaktunake, itom Dios Áchay bétana, entok Señor Jesucristota bétana.

Espíritupo tühua Cristota yore mákähui

³¡Tepa úttilsi maachi jü Dios, itom Señor Jesucristota Átchay! Sime jü tühuy itom tápuniak téhuekau ayukamtayi. Áman áamak itom anë bénasi itom ä mákkak, juka tühuaata, Cristota huämi. ⁴Entok tü éehuäpo Dios itom yeu púhuak, kee íkái ániata yáahuayo, íneli itom santomtunake tíaka entok báksiataka ími itom annakë béchibo, Áapörík béchibo. ⁵Yore nákuhäpo itom yeu púhuak, ä úusimpo itom nüka, Jesucristota huämi, Áapörík tü éäpo entok ínel ä huáatiäpo, ⁶ä úttilhuäpo

juka símek béppa ujjori Áa béchibo tü éehuäpo. Huámakiri Áapo itom mabetak, ä Úusi úttesi nákuhamtamak náuhui. ⁷Ä ójbo béchibote béja jínëutaka aane, jume itom Dios bejrim béja tuchari, yúmalasi ä tü éábeyi. ⁸Ito béchibo ä büruriak, juka át jüneeHuaka jita täyahuamta. ⁹Itom ä täyatuak, ä éäpo éсотaka bénasi maachik, ä huáatiä pámani. Áapo béja júkái yáa báreka éiyay, ä türë pámani. ¹⁰Íri jita yáanäu béja ínel huéiye, tiempota yúmayo, Cristota símeta náu tóijhuäpo nésaunakë béchibo, juka íneli téhuekapo ayukamta entok ími buíapo.

¹¹Dios Áapo ínel ä jünaktelatukay, Cristota huam ámani, juka Diosta áttiari itom ä áttianakë béchibo. Dios Áapo jíba júmü huam ä yáa báreka éiyay, bínhua naateka. ¹²Inélite Áa béchibo, ítapo jume bát Cristotat boobíchaíhuime, hua símek béppa ujjória Áa béchibotunake, ä úttilhuäpo. ¹³Huanäi eme éntok Áapörík bétana juka lutúria nokta jíkkajaka, juka evangeliota Dios bejrimmet enchim jínëumta

bétana huémta, éntokem ínëli Áapörík súsualeka, Espíritu Santopem Diosta áttiapo tatahua juka Áapörík itom mák rókaka nokakábeyi. ¹⁴Espíritu Santotate bát mák-ri, teboterita Bénasi, Júnaköri áman símeta itom mákhuäu núkisi. Huanäi béja jü Diosta úttihuame Áapörík béchibotunake jíbba.

Jü Espíritupo jita täyahuame entok machisi yore ä bíttuahuame

¹⁵Huäri béchibo ínapo, juka Señor Jesucristota enchim súalë bétana nokta jíkkajaka, entok síme jume Señorta súaleme enchim náké bétana, ¹⁶jíbane Diosta baysauhue enchim béchibo, enchimneu huáateka Diostau buanaka. ¹⁷Jü itom Señor Jesucristota Dios, jü símek béppa uyjóriapo Áchayhuari, espírituta át jünee huamta entok yeu machiriata enchim máknake, Áapörík bétana jita täyahuäpo. ¹⁸Áapo enchim jíapsipo machiriata ayutuanake, enchim ä jünerianakë béchibo, juka Diosta bétana boobit-huamta jítatukähui, entok jatchiaka itom ä boobichähui, juka téhuekau ayukamta jume santom áttianakähui, ¹⁹entok jáchin juka Diosta úttiära kaa lü-lüteka juebenaakähui. İri úttiäray itom ania itom ä súale pámani; huäri béchibo úttiärata jípure ä buere úttiärayi. ²⁰Entok huäri úttiäray két Cristota kókkolam násuk jíabitetuak; huanäi ä bátam bétana ä yétkhak, áman lóoria téhuekat jikachi. ²¹Síme úttiära

entok yäura jábe nésahueka aneme ják ayukamta béppa ä yétkhak, entok síme téhuam téttehuahuame béppa, entok kaa ímí ániat béppa jíbba, të hua ánia äbo huémstat béppa junne. ²²Entok síme ayukamta ä guókim bétuk ä tójjak, entok iglesiatau kóba yöpo ä kétkhak. ²³Jume Cristota sualhuäpo nau anim béjam Cristota takahua; huäri béchibo jume Cristota sualhuäpo nau anim Cristotay tápuni. Síme ímí ayukame éntok Áapörík béchibotaka ímí aayuk; Áapo éntok símekuu huéiye.

Ä súalhuaka béchibo yore jüneihuame

2 ¹Huanäi Áapo jíapsita enchim mákkak, jum kaa türiku enchim kókkolatuko. ²Inëlem rejtey, símeta juka kaa türík ímí ániapo johuamta joaka, huaka ímí jeka ániapo nésahuemta ääpo jíba jíapsaka. Huäri espíritu én ámet naa huéiye, jume Diosta nésahui kaa jo báaremmechi. ³Júnëlite két áme násuk jíapsay, kaa tüisi aneka, itom huakajta huáatiäu jíba jo báreka. Ä huáatiäu jíbate johuay, entok itom éähui. Kaa tühuapote usiarimtaka jíapsay, jume huatem Bénasi. ⁴Të Dios yore jiokolihuamta yúmalasi jípureme, tüisi buéresi yore nákuhamtayi Áapo itom nákkek. ⁵Júnëli jum kaa tühuapo itom kókkolamtuk junne, jíapsita itom mákkak, Cristotamak náuhui. Áapörík tühua béchibote jínëuri. ⁶Dios Cristotamak itom jíabitetuak,

entok két lóoriapo Áamak itom jóiyak, Cristo Jesústamaki, ⁷tiempo äbo huémtat machisi ä bíttebo báreka, juka Diosta tü eäü yúmalasi ä jípurèhui, juka itomak Diosta ára joähui Cristo Jesúspo. ⁸Bueituk Diosta tü eäü beyem jínëuri, enchim ä súalekä béchïbo. Ìri jínëuria éntok kaa enchimmet yeu simla, ál-la yúmalasi Diosta tü éäpo, ⁹kaa tékilta ára itom joä béchïbo. Ínëli kaabe joäyi áu jábelnake. ¹⁰Áapo Dios ínëli itom yáuhuak, tühuata ára itom jonákë béchïbo, Cristo Jesúspo. Dios íkái yáalatukay, jauhuey naateka, itom áma rejtinakë béchïbo.

***Cristo kúrusit mukuka
Diostau itom rúktiak***

¹¹Huäri béchïbo, áahuem huáate eme kétchi, jume kaa judíom, juka circuncisiónta mámammea yáata kaa jípureme, júnëlem téttehuaahuay.^a Të jüri circuncisión takahuat jíbapo jojohuay. ¹²Huámëi taahuarimmet katem Cristota jípurey; Israelta gentemmehuem mékka aaney. Entok jita Israelta mák báahuaka nokhuakapo, kaitem áma áttiakay. Jíta boobít-huäpem kaita jípurey. Ímí ániat éntok, Dios kaa enchimmet aaney. ¹³Të ëni Cristo Jesúspo, eme bannaataka mékka aneíhuim béja Diostahuem rúktiari, Cristota ójbo béchïbo. ¹⁴Bueituk Áapo ito béchïbo yánti jíapsihuame. Jume guoy pueblom nátepua aneíhui huépülsi jíba am yáuhuak. Juka sami kóräita

násuk órekäuta ä tátabek; bueituk ìri kara náu am antuay. ¹⁵Cristo kúrusit mukuka kaitasi ä yáuhuak, huame pueblom kara náu aneíhui. Juka Moiséjta ley yáari kutti nésahuepo jíba tahualatukay. Bueituk jume guoyim násuk juka yoremta bemelasi yáuhuak, yánti jíapsihuamta áme násuk yáaka. ¹⁶Bueituk kúrusit mukuka Diostamak al-leehuamta am mákkak, náhuichim, huépul takaahuasi am yáakari, juka náu ómtiraata kara emo bít-huamta mëaka.

¹⁷Cristo äbo yepsaka enchimmet ä nookak, juka tühua bemela noki yánti éhuamta, jume kaa judíom mékka anemmehui, entok huame judíom kaa mékka anemmehui. ¹⁸Cristota béchïbotaka náhuichikam aram Dios Áchaytau kiimu, huépul Espíritu Santota böot jíba kateka. ¹⁹Júnëli béja emëe katem nápat sékána buiärau joome, entok emëe katem entok kía naa rejtinake, kaa jóakari. Ënem béja Diosta pueblom joome, éntokem Áapörík familiapo jometaka áma náikiari. ²⁰Emëe kári johuamta bénaem. Ìri kári tétam naahuak, apóstolim entok profetam Dios huáatë bénasi. Jesucristo ínëli tua ájaria, jü tétta ejkinapo órekame. ²¹Ínëli jü káari tüisi náu cháataka yötusime, tiöpotu báreka, Diosta huépülsi éäpo, Cristota béchïbo. ²²Júnëli kétchi, eme ámakem yötusaka, Diosta Espíritu enchimmet ä annakë béchïbo.

^a 2:11 Ìri circuncisión entok jü ili usi ou bícho bea púnta chúktirihuame.

*Jü Pablota tékil jume
kaa judíommehui*

3 ¹Huári béchibo ínapo Pablo ímine pereeso Cristota béchibo, eme kaa judíom juka túhuata enchimneu ín huériu bárë béchibo. ²Jíbatua eme béja ä jikkajisula, jáchin juka Diosta áma nee yeu púalatukähui, enchim béchibo ín mák-ri. ³Jü yore yeu machiriahumta nee téjhuak, juka éhuil täyahuamta, bannaataka ilikkisi nee enchimneu ä jiojtekä bénasi. ⁴Eme juka jiojteta bíchaka ä nokátekem chë át jüneenake, jáchin machisi nee ä täyhui, juka Cristota bétana éhuil ín mák-ri. ⁵Iri éhuil huéeme bannaataka kat-riam yorem usiarim kaa täyatuahuakame. Të én ámeu yeu machiriahuak, jume santo apóstolimmehui entok profetammehui, ä Espíritu Santota huämi. ⁶Jü éhuil täyahuame ínel huéiye: bueituk jume kaa judíom judíommak ä áttiak, entokim ä takaapo huépülsi náu joome, entokim náu ä áttia, juka yore máknähui, Cristo Jesústa bétana, evangeliota huämi.

⁷Ínapone huatemmeu Diosta bétana nok iaahuaka yuktiari. Áapörik jita ára joäpo kanne ä mabetpo yúmala jiöbe; të ä úttiara páman nee ä mákkak. ⁸Ínapo síme jume Diosta súaleme násuk chë kaa jaichi. Kaa nee áma mabetpo yúmalatuk junne, nee ä mákkak, jume kaa judíommehui juka evangeliota ín noknakähui, entok juebenaara rícora kara näikiahumta Cristotat

ayukamta. ⁹Entok machisi nee am téjhuaanakähui, ják áman ä huéhui. Dios simeta yáalame íkai bannaataka naateka éhuil ä jípurey, ésota bénasi; én éntok yä machiriak. ¹⁰Ínel yeu simla, simetaka jume úttiakame jum téhuekat jikat aneme ä jünerianakë béchibo, juka yún jita täyahuamta juebenak ayukähui. Júkai béja jume Cristota sualhuäpo nau anim huam ámeu yúmatuanake, síme yäurammehui Diosta anëpo. ¹¹Dios jíba jauhuey naateka ä yáa báreka éiyay, Cristo Jesús itom Señorpo huämi. ¹²Én éntokte kaa jáchin éaka áu rúktinake, jü Diostahui, Cristo Jesústa súalhuäpo. ¹³Huári béchibone én íkai enchimneu aahua: katem kóm éiya, enchim béchibo ín guojajjuhüä bétana. Íneli eme túhuata jajamnake.

*Jü yore nákhuaame chë bat
huéiye jita tayahuamta béppa*

¹⁴Huári béchibo ínapo áu tónommia kíkte, jü itom Señor Jesucristota Áchaybehui. ¹⁵Ímírim áapörikúu am nüye, jume bem téhuam síme jume náu anim, áman téhuekapo entok ímí buíapo aneme. ¹⁶Áapörikúu nä nétane, jíapsipo huáijhua enchim ä máknä béchibo, símek béppa uiyorik ä jípüréhui, juka úttiäraata ä Espíritu Santoy. ¹⁷Áapo Cristo enchim jíapsimpo annake, enchim ä súalë pámani. Júnëlem Áapörikut kutti jotenake, mékka kóm nahuatulataka jum yore nákhuaäpo jíba aneka. ¹⁸Éntokem juka Cristota yore nákéu

täyanake, huatem ä súalemmaki, juka buékaata, tébiaata, mékka kómik, entok jákun tájti jikat órekähui. ¹⁹Éntokem juka Cristota yore nákeü täyanake, bueítuk jüri béja síme jita täyahuamta béppa chë bat huéiye. Huanäirem béja yúmalasi áy tápunitunake, Diostayi.

²⁰Áapo, úttiata jípureme símeta chë ára johua itom ä huáatiau béppa, entok itom eäu jüneriäu béppa. Áapo itot ä johua, ä úttiärayi. ²¹¡Áapörík béchibotunake jü chë ujoyória jum igleesiapo entok Cristo Jesúspo jíba yúu huasuhuasuktiapo! Júnentunake.

Espíritu Santopo náu anhuame

4 ¹Ínapone pereeso, Señorta tékil ín joä béchibo. Én éntokne enchimmeu nooka: Diosta núnurim bénasem rejte, juka yörisi machik jípureka núnuhuakamta bénasi. ²Katem emo chëhuale; al-leakem emo bitcha; emoem nák jikolë, yánti éaka. ³Juka enchim tülisi náu anëhuem jíba boojoria, juka yánti náu jíapsihumta jípureka. Jü Espíritu Santo Áapo enchim anianake. ⁴Huépul takaahua jíbba, entok huépul Espíritu. Dios símem náu itom ä boobittua, juka itom ä mákrókaihui. ⁵Huépul Señor jíbba, Diosta súalhuäpo júne huépülay, entok séjtul jíba yore batöhua. ⁶Huépul Dios jíba aane íkäite síme áchayek. Íri béja símem béppa káttek, símem béchibo, símekuchi entok símekuu.

⁷Të ítapo huépulayka ä mabet-la, juka jáchin itom ára jonakëhui; Cristota itom ä mák bäre pámantä mabetak. ⁸Huäri béchibo jü jiojteri ínel jiaahua:

Téhuekau jikau am núk siika, jume pereesom; juka kaa jiöbeka ára jita johuamta yoremem am mákkak.

⁹¿Jü áman “jikau sika” ti jíame, jáchisu jüntuk jiau báare? Bueítuk jum mékka kóm buíau bat kóm siika ti jiau báare.

¹⁰Huä kóm sikame éntok, íri két jikau siika, síme téhukam béppa, símeta tápunia báreka.

¹¹Entok Áapo két apóstolim jóiyak; huate éntok, profeetam; huate éntok, evangelistam; huate éntok, pastoorim, entok jume yore majtíame, ¹²jume Cristota súaleme yúmalasi bem yötunakë béchibo. Kaita ámeu bëyekam Diosta tékil jonake, juka Cristota takaahua jikau yötúria béchibo, ¹³símem itom áman yumäu tájti, jum huépülsi Diostat éehuäpo, entok jü Diosta Üusi täyahuäpo, jáchin juka yoremta yúmalasi áu jípurëhui, Cristota yúmalasi yötulataka áa beu áu jípureka.

¹⁴Katte nápat ili usim bénasi itom huériu báahuäu bíchaa náa kannake, jeka doctriinayi, jume yoremem yore bätäuta jípureka, lütüriata síme bem úttiabeyim ä huéria, jum yore náyotehuaka yore bätäuta jípureka. ¹⁵Tëte juka lütüriata jíba boojorianake, yore nákuhamtamak ä huériaka. Símekuute yötunake, huäri kóbatau chäkari; íri Áapo Cristo.

16 Jü síme takaa náu cháaka, ótam tottëpo, nánancham emo ania, jáchin ótam náu chäka tekipanua bárë pámani, yótuhamta mabetaka, emo nákuhápo yótuka.

Jü Cristotat bemela jíapsi

17 Íkáine két enchimmeu nooka, entokne Cristota téhuampo enchimmeu ä aahua: Katem éntok jume kaa judíom bénasi rejti báare. Ímëri béja bem éäpo jíba kat báare. **18** Bem kóba súahuápom kaa machiriak. Diosta täyahuamtahuim mékka aane, kaita bem täya béchíbo, entok námakak bem jíapsekä béchíbo. **19** Ímëi béjja, juka bem jíapsi námakasi joaka naateka, jum kaa türikuuhuim emo tójjak, síme juka chicha machik jo báreka, kaa emo yüeka. **20** Të Cristotat katem junëli ä täyak, **21** eme lütüriapo ä jíkkaij-latuko, juka Áapörík bétana yore majtiahuamta, juka lütüriata Jesústat ayukähui. **22** Juka bannaataka enchim jíapsäu éntok, emoem ä úhua, bueítuk huári ínëli jíapsihuame yorem óraata kaa tü éä bënna. Íri éntok kaa türikuu joyhualataka áu bätáulataka jíapsa. **23** Juka enchim éäu espíritupem bemelasi yáuhua. **24** Dios éehuápem bemelak emo sánkotua, Diosta lútula éä pámani, Dios éehuäpo huépülsi emo nüyeka, lütüriata huë pámani.

25 Huári béchíbo, juka aranókichiatem tójaka, lütüriata jíbem nooka, enchim bénasi yorememmaki, bueítuk símetakate huépul takaahuapo náu joome.

26 Öomtekátek junne, katem kaa türík yáa báare. Katem täata áman huéchëu tájti omti báare.

27 Katem diablota enchim jíapsipo kíkkibaktua.

28 Huä ékbuaíhui kaa éntok ékbuanake, ál-la tekipanuanake, tühuata mámammea joaka, jita jípureka juka jìokot éamta aniä béchíbo.

29 Kaita noki chicha machika enchim tempo yeu huéenake, hua türika jíbba, entok huaka tüisi huéchemtem jíba téhuaanake. Bueítuk jábetau bëyemta tühuay yótunake, entok ä jíkkajame Diosta tühua mabetnake. **30** Katem juka Diosta Espíritu Santota síroktua, íayírem sellota bénasi ä mák-ri, enchim jínëuri taahuari béchíbo.

31 Juka enchim jíapsipem chibu éehuamta emo úhua, ómtiraata, kujti éehuamta, chayhuamta entok jábetat béttesi nokhuamta, entok síme kaa tü éehuamta. **32** Ál-lem emo nákeka náu aane, emo nák jìokoleka. Jíta nat ínnëatek junne, emoem jìokore, Diosta enchim jìokorekä bénasi, Cristotat éehuäpo.

Machiriapo usiarim bénasem rejte

5 **1** Eme nákuhame Diosta usiarim, enchim Dios Áchayta bénasem emo nüye.

2 Emo nákuhápo jíbem rejte, Cristota itom nákekä bénasi. Áapo itom nákeka áu tójjak, ito béchíbo. Juka Diostau bíchaa náikiari áu óorek, entok jìokot aneka mëhuaka musála jubasi Diostau jìkau yuumak.

³Të jume kaa emo jubeka náu anhuame entok síme jita chicha machira ö úttesi tomit kopteme, kaa enchim násuk téhuaapo yúmala, ál-la Diosta súaleme emo nüyë bénasi jíbba. ⁴Juka nokta kaa náu bátasi huémta katem ä nooka, juka kaa suamsi emo nühuamta junne. Juénasi nokhuamta, katem ä nokpo yúmala; ál-lem Diosta baysahueka aane. ⁵Bueítukem béja íkái júneria, jü kaa emo jubeka náu jíápsame, ö chicha machik jíápsékame, ö úttesi tómit kopteme tattäbui diosim súalhuäpo bénna. Kaita áman áttianake, jum Cristota entok Diosta reyataka am nésahuepo. ⁶Kaabe enchim baítäunake, kia jájana nokaka, bueítuk fári béchíbo jü Diosta omtëhui áme béppa kóm sisime, huame usiarim Diosta nésahui kaa jo báareme béppa. ⁷Katem bem joäu ámemak jo báare. ⁸Bueítukem bannaataka kaa machiku rejtey; én éntokem Señorpo machiriam; machiria usiarim bénasem rejte. ⁹Bueítuk jü Espiritu machiriapo ímëi taakak: juka tü jíapsihumta, juka lútula huémta, entok lutüriata. ¹⁰Juka Señorta türëuhuem yúmalasi át jünéaka ä johua. ¹¹Entok juka kaa machiku bem joähui, katem ámemak ä johua; al-lem kuttílasí ámeu nokaka yeu am buísse. ¹²Bueítuk jü éhuil tiusi machika bem joäu katchan át nokpo yúmala. ¹³Të síme yeu buíjhuakatek, jü machiriata béchíbotaka yeu boböte, síme

jita yeu buíjtaka ják ayukame. Bueítuk jü machiria símeta yeu buíbuise. ¹⁴Huári béchíbo ínel jiaahua:

Búsäe empo kócheme,
éntoke kókkolam násuk yejte.
Huanäi Cristo enchi
machirianake.

¹⁵Át suakem ä bitcha, jáchin enchim rejtëhui, kaa huame kaa susuakame bénasi, ál-la suaka júneame bénasi. ¹⁶Juka tiempota ímë ayukamta katem kíal ä simtua, bueítuk jume taahuarim itom ámet jíapsähuim katim türi. ¹⁷Katem kia rokosi emo nüye; ál-lem át suuhua, juka jita Señorta huáatiähui. ¹⁸Katem vinota jëye, áy naako báreka, bueítuk jájana anhuäu bíchaa enchim huériunake; ál-lem Diosta Espirituy tápun báreka éiya. ¹⁹Buikim jíápsipo yeu huéeme, himnom entok salmomem náu ejtejhua. Inëlem buiika, Señorta úttileka enchim jíapsimpo. ²⁰Jíbem símeku ä baysauhue juka Dios Áchayta, itom Señor Jesucristota téhuampo.

*Nánabeu éehuäpem nánancha
bétuk emo jípure*

²¹Nánabeu éehuäpem nánancha bétuk emo jípure, Diosta yörihuäpo.

²²Jume kunakame bem kunam bétukim jíapsinake, Señorta bétuk bem jíapsä bénasi. ²³Bueítuk jü kunahuari ä jubiabeu kóba yöhue, Cristota jume Cristota sualhuäpo nau animmeu kóba yöhuetukä bénasi. Jume Cristota sualhuäpo nau anim éntok Cristota takaahua;

áapo éntok ä jínëula. ²⁴Jáchin jume Cristota sualhuäpo nau anim Cristota bétuk emo nüyë bënasi, ánëli kétchi jume kunakame bem kuna bétukim emo nünake, símeku.

²⁵Kunahuarim enchim jubimem nákke, Cristota ä Cristota sualhuäpo nau anim iglesia náké bënasi. Entok ä jíapsihua áa béchíbo tójjak, ²⁶huépulta bënasi ä tahuaria báreka, yúmalasi ä basuaka, ä nokiy báampo ä bákxiaka. ²⁷Áapo áa béchíbo ä bíttebo báare, juka igleesiata, símek béppa ujjorik, kaa chícha maachik entok kaa choorik, huépülsi áu jípuremta, kaa chícha maachik. ²⁸Júnëli kétchi jume kunahuarim bem jubiamim nákpo yúmala, bem takaahuam bem ériä bënasi. Ä jubiahua nákeme áapo két áu nákke. ²⁹Jauhuey júne kaabe ä takaahua muksi eriaka jíapsa, ál-la ä jíbúätuanake entok ä suayanake, Cristota ä igleesiahua ä suayaka símeta ä máká bënasi. ³⁰Bueítuk ä takaahuapote áamak aane, ä óta huakajmaki. ³¹“Íari béchíbo jü yoreme ä áchayhua entok ä áyehua tö simnake. Huanäi béja ä jubiabeu ruktinake. Inëlim huépülak náu takaanake, jume guoyika.” ³²Buéresi maachi, íri éсотaka bënasi täyahuame, tē ínapo én enchimneu ínel jiaahua, Cristo entok igleesiata bétana nokaka. ³³Huäri béchíbo, hueepulayka ä jubi náknake, enchim emo eriä bënasi; jü jámut éntok ä kuna yörinake.

6 ¹Eme usiarim, Señorta nésaupo enchim áchayem

nok jíkkaja, bueítuk íri tua lútúria. ²Em áchay entok em áiye, Akë am yöre: “Íri kësam nésehui tühuata itou nüpame, ³tüisi emou ä huéenakë béchíbo, éntoke búru huásuktiriam jípunake, ímí buíapo.”

⁴Eme áchayhuarim, katem enchim úusim omtitua, ál-lem túlisi am yóturia, kuttílasi ámeu nokaka, Señorta nésaupo.

⁵Eme sáyhuaka tekipanuame ímí buíapo enchim tekodem yöreka am nok jíkkaja, chíkti enchim jíapsimmaki, Cristota nésau johuäpo bënasi.

⁶Katem bem bíchäpo jíba emo bamijtuaka tekipanua, yoremem bíchäpo tüisi tahua báareme bënasi; tē ál-la Cristota nésau joame bënasi, chíkti enchim jíapsimak Diosta huáatiäü joaka. ⁷Al-leakem tekipanua, Señortau tekipanuamta bënasi, kaa yorememmehui. ⁸Jünëaem, jü tühuata yáakame Señorta bétana béjtuatunake, jábetaka junne cháka ö búttiataka tekipanuame.

⁹Eme éntok, tekohuarim, ánëli bënasi ámemak emo huériunake, katem am guomguomtiaka am máujtuanake. Júnëaem jü Señor téhuekau káttek, bem Señor entok enchim Señor. Áapo kaabem yeu píuhua; símem nánancha nákke.

Espíritupo nássuahuame

¹⁰Eme éntok, ín hermaanon, Señortamakem kutti emo buísse, ä úttiärat éaka. ¹¹Akem ä sánkote, síme juka áy nássua béchíbo juka Diosta yore mákáhui. Huanärem kutti jáptenake, juka diablota

jita bénak enchimneu huéetuay junne. ¹²Bueituk katte huakajta entok ójbota bėj-reka nássua; ál-la jume diablota ángelesim ímí ániapo kaa türik jita sáhueme, úttiára jekapo rejteme, kaa machiriapo néshueme, kaa türik joame, ángelesim juebénakari entok jikat aneme. ¹³Huäri béchibem ä nüye, juka áy nássua béchibo, Diosta yore mákähui. Huanärem béja yölataka áma yeu kannake, simeta tüisi yáasulataka kutti jäbueka. ¹⁴Óusem jäbue, jöot lütüriata súmalataka, sisiguokta jípureme yómpaka, lútula jíapsihuamta sánkoka, ¹⁵éntokem juka bemela tü nokta bochaka kannake; jüri béja yánti jíapsihuamta huériame. ¹⁶Juka escuudota éntokem nüye, jüri jü Diosta súalhuame; huáyirem ä tuchanake, juka táijta diablota enchimneu jímmaanakhui. ¹⁷Éntokem juka sisiguok möbeta kóbat enchimmet yétcha; jüri béja Diosta itom jínëuläu nätua. Entok jume Espiritu Santota ejparam; jümëi béja jü Diosta nooki. ¹⁸Kaa chüktekem Diostau nooka. Simekem áu buaana, éntokem Espiritupo áu ä nétane. Katem kópteka emo suaya. Sime jume santom béchibem Diostau nooka. ¹⁹Ino béchibo kétchi; eläposune

juka tenta ín étapo bélëkisi nokta jípunake. Juka tü nokta bemelasi huémta éhuil kaa täyahuamta am jüneetuanake, óusi éaka. ²⁰Júkai jo béchibone ímí aane; téhueka bétana nokta máktaka ä jípureka ä huiutia, kareenampo pereesotaka. Diostahuem nee buania. Eläposune óusi éaka Cristota bétana noknake, huéchiapo áman jibba.

Ä chúpëpo teboteri

²¹Bueituk ino bétana simeta enchim jünerianakë béchibo, ín joähui, júkai enchim jüneetuanake jü Tíquico, hermano tüisi nákhuame entok chíkti ä jíapsimak Señorta tékilpo aneme. ²²Huäri béchibone enchimneu ä bíttuak, jáchin itom anëu enchim jünerianakë béchibo, entok al-leaka enchim jíapsi jóotenakë béchibo.

²³Yánti jíapsihuame jume hermanom béchibotunake, entok jü yore nákhuame, entok jü Diosta súalhuame, Dios Áchayta bétana entok Señor Jesucristota bétana. ²⁴Jü Diosta tü eäu sime jume Señor Jesucristota nákemraktunake, jü yore nákhuame kaa lülüteme. Jünentunake.